



近代中國史料叢刊分類選集

沈雲龍 主

朱九江（次琦）先生年譜

簡朝亮著

丙集：年譜傳記類

蘇州工業學院圖書館藏書章

文海出版社印行

朱九江先生年譜

卷首之二

嘉慶十有二年

歲在丁卯

八月辛卯

二十日

先生生

先生諱次琦字稚圭一字子襄先世子議居南海九江方明祖龍興設不爲君用之罰子議終身偁元處士不改度焉七

傳至夔州知府讓仕萬厯時以治行第一拜璽書之賜

詳四川通

志廣州鄉賢傳

是爲先生八世從祖讓孫實蓮以戶部郎中受特勅

與陳文忠子壯舉誼殉節高明

皇朝賜諡烈愍

詳明史列傳

是爲先生六世從祖父贈公成發贈如先生秩蘇人有主於公者年七十歸休以佗人所負二千金俾公自收之公陽諾四千里外卒反其金嗜觀邸報災患必歎嘗謂諸子曰凡人有力在己而不及人非天命富貴意也汝曹識之矣母張

太宜人知文史族子爲盜魁瞰贈公歸颺言索之金太宜人語贈公請與諸子佗適旣行盜夜嘯叔門太宜人扶媪持燭出從容詰曰嘯叔者誰何遽也叔偶出盍入而待之闔闔納盜魁其黨數十人竝於門外盜魁踞上坐解佩刀錚然太宜人嘯婢淪茗復詰嘯叔何居盜曰將亡命假數百金門外盜皆譟應太宜人正容曰汝佞叔屬雖遠猶骨肉也有急當告我何遽若是迺入探釵珥數事解腕中條脫益之曰汝將去不足可復來何待叔也盜大慙竟棄去繼母關太宜人俯諸子如腹出先生嘗病十旬閔鬻忘勞體爲之敝伯兄士琦與先生同舉於鄉能詩以粵中西江水患繇沙田石壩上書大府議除其患

詳南海縣志朱氏傳芳集

仲兄炳琦季弟諸生宗琦叔者先

生也

十有三年

歲在戊辰

先生年二歲

先生周晬甫學語張太宜人抱諸榻上授以唐人絕句代小

兒歌謠

十有五年

歲在庚午

先生年四歲

張太宜人問曰兒願多錢否曰不願願高官否曰不願何願

曰人盡愛兒兒則願爾

十有六年

歲在辛未

先生年五歲

冬先生始入塾受書叔懿脩先生旣自塾歸夜寒雨雪張太

宜人藉先生寢篝火温衣先生遽曰如今窮人可念也

十有八年

歲在癸酉

先生年七歲

先生能爲詩

二十有二年歲在丁丑先生年十有一

贈公腹疾治之不瘳先生幼惶恐手疏祝竈陘搏顙流血贈

公遂瘳

二十有四年歲在己卯先生年十有三

先生同里曾勉士廣文說先生幼敏以先生調制府儀徵阮

文達命作黃木灣觀海詩文達驚曰老夫當讓此子出一頭

地過子彩旗門作矣擊經室集有乍浦彩旗門觀海詩

道光元年歲在辛巳先生年十有五

冬十有一月丙辰張太宜人卒先生執喪居先廡東廂杜門

三年默思而純於是強識踰素巨簡之書循眊者三輒誦不

忘

四年

歲在甲申

先生年十有八

春二月先生服闋肄業羊城書院山長謝里甫先生能書嘗曰書雖小道非儻悟者不能通其意吾友教歲數百人饒學此者朱生而已迺授筆灑辟呬詔之曰實指虛掌平腕豎鋒小心布真大膽落筆意在筆先神周字後此外丹也手輭筆頭重此內丹也又曰晉辨神姿唐講閒架宋元以來尚通峭之趣矣然神物無蹟易於羊質虎皮以趣勝者卽有所成祇證聲聞辟支果耳不成終身遂流魔道不可振揀初學執筆折中祛弊其諸顏平原歐陽渤海間虜繇是先生工人灑先生幼而端靜彈碁六博諸戲不一游日讀書之餘略求人

灑而已凡書百家耽讀采市典衣如不及聞藏弄家有其書
婉借之必得迺適

夏先生赴院試如 功令不挾一字先生連試席者紈袴

家子也倩遞失排律迺出金條脫乞作維筍及蒲詩先生不
納

七年

歲在丁亥先生年二十有一

夏常熟翁文端來督學先生試皆第一補邑弟子員再試之
日先生橐筆入文端命升堂屬藁數行輒先取眡點首而誦
比莫藁未脫文端親然蠟炬勞曰勉竟若長毋躁也

先生念母不已過先孺人墓詩云頭顱爾許人猶昔愴絕人
閒二十年

邑人李孝廉鳴韶先生總角舊也欲爲貲郎先生贈詩風之
云名士貧來有宦情聞諸先輩李黼平吾道貧非士也苦苦
以無力振貧故錦衣怒馬僕曼胡君昔視之不如奴歎然欲
起六月息身落南蠻心注北芭蕉戰雨碎可憐仍扈江蘿障
蘭蓀宏獎之風近來少休文休進彈蕉表

新疆回部張格爾久爲亂至是猶未平先生有感詩云敢以
烽爲戲須明國有權整疆光舊物不擬勒燕然又云廩藏資
先事安危在正供似聞司會議有藉世時雍

八年

歲在戊子

先生年二十有二

秋先生赴鄉試將試先生檢舉子業曰韓退之云旣爲之欲
有所就已而報罷先生讀書囂囂自若也曰朱子云非科舉

累人人自累耳

九年歲在己丑先生年二十有二

春正月丁巳贈公卒先生執喪居先廡東廂絕不爲詩文血

誠致哀三年如一日

十有一年歲在辛卯先生年二十有五

夏四月先生服闋

十有二年歲在壬辰先生年二十有六

先生肄業越華書院山長桂林陳蓮史先生一見異之曰天下士也嘗以天中節燕諸生命賦新松先生詩云棟材未必千人見但聽風聲使不同陳先生爲吟諷者久之

秋先生赴鄉試報罷有以幸雋告者先生曰不勤而祿死望

而得唐李景讓之母所以憂也吾今事母奚可幸虜

十有三年

歲在癸巳

先生年二十有七

邑人徐大令台英佩韋與先生交先生曰佩韋爽直人吾執友也故先生於大令風誼尤勤大令長吏才會試報罷儕輩將資之俾借一官先生獨止之夏五月寄徐子都門詩云一第溷人信茫昧十年養氣從掀揉京雒緇塵自古嗟君有素衣無恙否大令得詩遂止先生之詩古所謂執友備其仁也佗日夢讀佩韋近藁卽寄懷落第南還詩云故園尚有冬青樹歲莫山寒共往還亦其風也於後大令卒以名進士宰華容調耒陽克馴莠民均垸隄正錢糧花戶湘陰左文襄奏

聞其事

國史館立傳耒陽人祀之龐士元祠

夏五月庚辰大水隄決李邨先生奉關太宜人緣岡避水先生赴李大招飲百韻詩追賦之曰驀報西潦至五月日在庚

五

老首

夏五月庚辰大水隄決李邨先生奉關太宜人緣岡避水先生赴李大招飲百韻詩追賦之曰驀報西潦至五月日在庚

降割方鞠凶洪口決李邨嗟嗟十二戶

原注地名

盡室為魚鼈比

鄰聞號咷誰知其死生我家三百指乘屋如鴟蹲膳飲波面

炊雞狗牆頭眠高漲更未已滅沒驚我顏昏黑扶老穉一一

下破船室人莫涕泗我有好弟昆緣岡互房廬足以相援攀

可憐非柁工尾掉船頭橫滉漭涉中流上有星月明喜達賢

主人舍我在高閔色定見憔悴老親蹙額歎弱妻授我食執

箸不下咽脫我淖中衣易我犢鼻禪展視著股處血痕已朱

殷憐惜不出口泣睫淚漣漣搖手使勿聲吾母腸斷問民生

正摧挫我敢自求安願以膚髮勤易此骨月完知詩者以是

爲杜子北征之遺也

爲大水故撫軍上元朱莊恪行旼勸分且問士焉勸分三君子鄧鑿堂觀察區仁甫考功何樸園職方皆以先生對先生館西郊莊恪將就見之屬考功申意先生固辭曰生方赴試不敢涉嫌貽口實也迺不果制府涿州盧敏肅遣吏徵寫先生詩敏肅曰天下雖大人才有數敢不勤之虜嘉興錢給事儀吉來粵年已七十聞先生名就見西郊於後序先生詩九江少穀豐魚桑先生謀於鄉迺建義倉大水之役萬口罄罄先生食之也

十有五年

歲在乙未

先生年二十有九

阮相國詒書盧制府言選高才生肄業學海堂於是選者十

人先生爲舉首先生以疾辭不赴

田祖有神曾孫所以思古也先生蝗蟲歎詩云回首

仁皇晚季時不在人間在天上

白華之絜孝子也祿不逮養孝子之傷也先生客中雜憶詩云突梯古有戒奉檄世亦賢審知出處誼固以父母年壯且不如人此後空可憐

采蘋灑度季蘭尸之今猶多先王之澤庠先生守歲與閨人

夜話詩云高懷吾媿汝卒歲恥言金

原注宋眞山民詩貴無可買恥言金

十有六年

歲在丙申

先生年三十

先生館邑六榕寺同舍生謂之曰君論事不易聞及聞之則疏折鴻鬯傅以古事意豁如也賈長沙馬賓王君之倫也

十有七年

歲在丁酉

先生年三十有一

秋先生赴鄉試獲薦試文用史主者以麤棄之報罷主者發卷眊其名迺先生也悔之先生俳體戲答友人問詩美人秋心道其事也

九江周數十里如

功令建鄉約所薦鄉先生司約焉

龍雜之居君子不樂就也陳大令信民梅坪惟先生一言而就里門羣德彊蔬躡蹤武舉某老矣猶縱博爲姦利先生首謀於大令曰鄉患惟甚梅坪其可已虘迺鳴官實之灑先生感事詩云數百容公輩其如扞網終敗羣愁害馬亂眠惱飛蟲事以心平定機先日聽聰不文嗤絳灌黨論本來空蓋感於斯也

冬十有二月癸丑陳大令卒先生寓書馮愛之孝廉籌卹都門曰陳九身後無子寡妻弱女慘慟鳴號近識遠交異聲同歎至乃里父村僮寵姬走卒亦用惘然昔一國輟音春者解哀五殺百身可贖詩人以痛三良以古方今伊其信矣吾兄儻亦有聞而心惻者邪迺者總幃虛掩四壁風颺食蓼將荼不言而喻竊意渠同年世舊官京朝赴上計者咸萃都下得否會知賄賂遲速叨收嗟乎東里西華有後遜任君之殤素車白馬舉喪遲范叔之來讀者感焉故事搢紳卒於鄉未有籌卹都門者大令名進士賢而有文重以先生書故勸舉而人從之郵數百金卹其家是歲鄉人岑績熙卒母劉年九十矣家貧遺幼孤五男二女先生以布鄉人卹亦忘亡也

十有八年

歲在戊戌

先生年三十有二

邑學三舉優行先生爲舉首皆不赴先是列優籍者多納金先生以士望得之猶謝去

十有九年

歲在己亥

先生年三十有三

夏五月大水鄉隄瀕危先生與孝廉馮愛之明次卿馳赴之列丁夫豐餉犒埤黏土橐杙連雲萬杵陞作越四日而隄復完當是時風雨暴來飛濤及面足下洶洶作聲鄉人色駭先生山立而奠之皆相慶也隄趾故多叢葬築者疑畏先生手椽其上曰隄決地且瀦焉豕骨何有如彼不諒惟予之崇迺卒工鄉人以多先生而先生不居焉先生憫潦呈兩孝廉詩云大隄如堅城浮照同轄毛延緣一綫泥障壅千丈濤是時